



Inatsisartut Suleriaasianni § 36, imm. 1 naapertorlugu matumuuna Naalackersuisunut imaattumik apeqquteqarniarpunga:

Naalackersuisunut apeqqt:

- 1. Naalackersuisut Nuna allanngutsaaliukkamut – tassungalu ilanngullugu tamaani piujuartitsinissamik siunertaqarluni takornariatitsinerup ineriartortinneqarnissaanut – aqutsinermut pilersaarutitigut sumut killippat, Naalackersuisut 2002-mi upernaakkut ataatsimiinnermi Avannaani Tunullu Avannaarsuani iliussissatut pilersaarutip suliarineqarnissamik nalunaaruteqareernerisa kingornagulli?**
- 2. Naalackersuisut Nunat allanngutsaaliukkat eqqarsaatigalugit taakkunani killeqarfilersuinnikkut immikkortitaarnissaat qanoq eqqarsaatigaat, taammaalillutik nunat immikkoortitaarnerini aalajangersimasumik annertussusilimmik aqqissuussamillu takornariatitsinermik akuersissutigineqarsinnaangorlugu?**
- 3. 2005-imi Naalackersuisunit nalunaarutigineqarpoq Nunat allanngutsaaliukkat eqqarsaatigalugit ilisimatusarneq takornariatitsinermillu inuussutissarsiuteqarnermut tunngatilugu takornariatitsinermi ilisimasortat, nunami allanngutsaaliukkami nakkutilliisut kiffartuussinermillu sulisussat nunatsinneersut pillugit pilersaarutit suliarineqartut. Suliaq tamanna sumut killippa?**

(Inatsisartunut ilaasortaq Marie Fleischer, Demokraatit)

Tunngavilersuut

Ullumikkut ataatsimut isigalugu Tunumi nunami allanngutsaaliukkami takornariatitsineq ingerlanneqanngilaq. Tamaanga taamaallaat ukiumoortumik ilisimasassarsiortut ikittunnguit umiarsuillu takornariartaatit ikittuinnaat tikittarput. Oqanngilanga nunami allanngutsaaliukkami aqqissuussamik takornariaqartitsinissaq aqagu ammaatissagipput, isumaqarpungali takornariatitsinerup ullumikkuminngarnit annertunerusumik ingerlanneqalersinnaanera misissugassaqqissoq. Isumassarsiorfittummi nunat kititsinniittut sanilerisavut atorsinnaavavut.

Canadami nunani allanngutsaaliukkani malittarisassat nalinginnaasut immikkut malittarisassanik ilassuteqartinneqartarput, taakkunani soorlu timmisartunik atuineq, qissattarneq, eqqagassat isumaginerat il.il. inatsiseqartinneqarlutik.

Canadami nunat allanngutsaaliukkat nakkutigineqarnerat nunat immikkoortitaarnerannik tunngaveqarpoq. Immikkoortitaareriaatsimi tassani nunat tatsillu nalunaarsorneri ilaatinneqarput pinngortitap qanganilli pissusaata kulturikkullu eriagisassat allanngutsaaliorneqarnissaasa qanoq pisariaqartinneqartiginerat eqqarsaatigalugu takornarianullu qanoq annertutigisumik atorneqarsinnaanerat qanorlu piukkunnaateqartiginerat eqqarsaatigalugit. Nakkutilliinissatut pilersaarutini nunat immikkoortitaarneri nassuiarneqartarput, nunat taakkua atorneqarnissaanni takornarianullu qanoq piukkunnaateqartiginerisa akornanni oqimaaqatigiissitsinissaq qulakkeerniarlugu.

Iliusissatut nalunaarusiami 2001-imeersumi anguniakkat immikkoortunut pingasunut agguataarneqarput qangali nakkutilliinermi periaatsit suullu amiakkuusinnaasut siullermik iluarsaateqqaarnissaasa pisariaqartinneqarneratmalillugit suliassaqarfittut immikkoortitaakkanik, tulliullugulu ineriartortitsinissamut killiliussat pitsaanerpaat pilersillugit.

Anguniakkat Naalackersuisut 2002-mi saqqummiussaasut pissanganartuupput. Anguniakkat, piviusunnngortinneqarunik, Kalaallit Nunaanni nunat allanngutsaaliukkat siunissami nakkutigineqarnissaannut aalajangiinissamut tunngavissamut atorsinnaasumut ammaassissapput, taamaattumillu Naalackersuisut tamanna pillugu akissuteqarnissaasut pissangallunga utaqqillugu.

Naggataatigut erseqqissaatigissavara nunani allanngutsaaliukkani takornariartitsinerup ineriartortinneqarnissaa soorunami nunatsinni najugallit peqataatinnerisigut, piujuartitsinissamik siunertaqarluni soorunami ingerlanneqassammat, aammalu eriagisassat nunami allanngutsaaliukkamiittut isuman-naatumik illersorneqassallutik.